



**ATASSUT**

**UPA 2015/124**

**Siverth K. Heilmann**

**15. 05. 2015.**

**Aatsitassarsioqatigiit aatsitassanik misissuiniarneranni aammalu misissuinerit suli ingerlagallarneranni innuttaasunik oqimaaqatigiissumik paasissutissiisoqartarnissaa siunertaralugu, apeqquteqaat tunngavigalugu Inatsisartut oqallinnissaannik siunnersuut.**

(Inatsisartunut ilaasortaq Kalistat Lund, Inuit Ataqatigiit)

Siullermik inatsisartuni ilaasortaq, Kalistat Lund, Inuit Ataqatigiit, apeqquteqaat aallaavigalugu oqallisissiaqarninni qujanaq, ATASSUT-miillu imatut naatsumik oqaaseqassaagut.

Siunnersuuteqartoq tunngavilersuuteqarluni aallartippoq, aatsitassarsioqatigiiffiit ataasiinnarmik, tassalu aningaasarsiorinissamik, siunertaqarlutik maani nunatsinniittut. Tassunga atatillugu ATASSUT-miit oqaatigisariaqarparput, nunatsinni ataasiinnaavallaartumik aningaasarsiornerput tapertaqartikkusullugu, aatsitassarsiorinissanut misissuinerit aningaasaliisinnaasunillu kajumilersitsiniarneq suliaq iluatsilluarsimammat.

Kinguariit siunissami suliffissaqassappata aningaasarsiorfeqassappatalu, politikkikkut anguniagaajuartariaqarpoq nunami suliffiit ataavartut. Akimmiffissalersuinata soqutiginnittunut aqutissiuussisariaqarpugut, uvagut ATASSUT-miit tamakkiisumik suleqataaffigaarput sunniuteqarfigilluartarlugulu.

Siunnersuuteqartoq ATASSUT-miit isumaqatigilluinnarparput oqarmat, aatsitassarsiornermut tunngasutigut Nunatsinni annikitsuinnarnik misilittagaqartugut nunanilu allani misilittagaalersimasut inatsisitigullu naleqqussarfigineqarlutik ineriartortittuagassaasut.

ATASSUT-miit oqaatigeqqillaput, aatsitassarsiorfiit nunani allaniittut qinikkaniik atorfilittaniillu ukiorpanngortuni paasisassarsiorfigineqartuarmata aammalu aatsitassanut inatsisiliornitsinni misilittagaasut naleqqussarfigisimallutigit. Taamaattorli qularutissaanngilaq inatsisiliortutut inatsisartuni naleqqussaanerit uninnaviannngimmata.

Naalakkersuisut siunnersuuteqartumut akissuteqaataat innuttaasunut paasisitsiniaanerit ilanngullugit ATASSUT-miit ersarissutut nalileratsigu annerusumik oqaaseqarfigissanngilagut, naggasiulluguli kaammattuutigiinnarusullugu, partiit tamatta innuttaasullu suliffissanik ataavartunik pilersitsiniarnernut suleqatigiilluarnerusariaqartugut.

Taakkuupput ATASSUT-miit oqaatigiumasagut.